

Kalaallit Nunaanni meeqqat pillugit inatsisip Kalaallit Nunaannut atuutilersinnissaanut peqqussutissatut missingiummut aamma meeqqat pilersorneqarnerat il. il. pillugu inatsisip Kalaallit Nunaannut atuutilersinnissaanut peqqussutissatut missingiummut Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut

(Meeqqanut, Inuusuttunut, Ilaqutariinnut Peqqissutsimullu Naalakkersuisoq)

Akissuteqaat

(Meeqqanut, Inuusuttunut Ilaqutariinnullu Naalakkersuisoq)

Aappassaaneerpeqarnera

Inatsisiliornermut ataatsimiititaliaq aalajangiiffigisassatut siunnersuummut matuminnga isumaliutissiissummik saqqummiussivoq.

Isumaliutissiissummi ataatsimiititaliap isumaqatigiittup siunnersuut akuerineqassasoq inassutigaa.

Isumaliutissiissummi Meeqqat pillugit inatsit, atinut inatsisip aamma inatsisit allat allanngortinneqarnerat pillugu inatsit nr. 227, 15. februar 2022-imeersumit meeqqat pillugit inatsimmi il. il. allannguutit sooq Danmarkimi atuutilersinneqarsimannginnersut pillugu itisiliiffigeqqulluni ataatsimiititaliaq qinnuiginnippoq. Peqatigitillugu ataatsimiititaliap meeqqat pillugit inatsimmi il. il. allannguutit taakku Kalaallit Nunaanni piaarnerpaamik atuutilersinnissaannut Naalakkersuisut sulissuteqaqqullugit kaammattorpai.

Noqqaassuteqarnikkut Isumaginninnermut, Ineqarnermut Utoqqarnullu ministereqarfiup ilisimatitsissutigaa, inatsimmut allannguutit pineqartup Danmarkimi atuutilinnginneranut pissutaasoq tassaammat anaanaaqataanermut nalunaarsuisarnerup pisariillisarneqarnera pillugu malittarisassani anisuunik ingerlatitseqqittarneq tunngavigineqarmat, tamannalu timip ipiutaasartai pillugit inatsimmi, timip ipiutaasartaanik uumassusillillu sananeqaataanik peqqinnissaqarfik avaqqullugu inuinnarnut ingerlatitseqqittarnerup inerteqqutaaneramik aalajangersagaqarnera malillugu pillarneqaataasinnaammat.

Taamaattumik anaanaaqataanerup nalunaarsorneqartarnerata pisariillisinnissaanut, inatsimmut allannguutit ilai allat peqatigitillugit, taamaassinnaappat naleqqussakkanik, malittarisassiornissamut periarfissanik qulaajaasoqalereernikuuvoq.

Ataatsimiititaliap kaammattuutaanut, Kalaallit Nunaanni ataataaqataanermut inatsisiliornerup eqqunneqarnissaanut tunngatillugu, tamatumunnga sulineq aallartinneqareersoq inatsimmillu piareersaasoqaleruttortoq ilisimatitsissutigineqarsinnaavoq.

Taamatut oqaaseqaateqarlutik Naalakkersuisut ataatsimiititaliap sukumiisumik sulineranut qujapput siunnersuutigineqartullu akuersissutigineqarnissaanut inassuteqarlutik.